

(Nain,NL) Mai 22, 2007 – Nunatsiavut kavamanga KaujimakKujjuk Ikajuttaugutilimminik atuinnaagulinimik unuttunik ilinniaviuKattasimajunik Labradorimi ilitagijaukKulugit ilinniaviusimajut kenaujattâviusongutillugit kavamanganit Canada. Ikajuttaugutilet ilinniaviliaKattasimajuit mânnaujuk Kanugalak pingisâgaluappata.

- Merz 2007-imi idluatsaivet unuttuni nunanni Canada-mi angiutiKalaukKut pimmagittumik kenaujattâgijaugunnagajattunik NunalituKaujunnut ilinniavinnut aisimaKattajunut.
- kenaujattâgijaugunnatunik AngiKatigegutik angittaumalluni Merz-imi ilingajuk ununnilinnut 80,000 NunalituKaujunut ilinniaviliaKattasimajunut ilitagijaujunut ilinniavinnut ilonnâni Canada-mi. Malilluni killigiudjaumajumik ullusamik angiKatigegutiumajuk âkKisuttaugunnalâkKuk.
- kingungagut angiKatigegutiusimajuk âkKigiattaumalippat Kanitagalangani September 21st, 2007, inuit KinugautiKagunnalâttut “UKumaitsasimannimut Akilegutimmik” anginiKatillugu \$10,000 ilagialluni \$3,000-tut jâri tamât ilinniaviliaKattasimanninginnut sivullipângata jâriup kinguniagut.
- IlinniaviliaKattasimajut uivisâlukattausimajut upvalu pilukâttausimajut upvalu isumajâluKapviusimajut KinugautiKagiagunnalâttut kenaujannik atâgut “Imigut Kaujisattaumanikkut.” Tâna ilagiagutiujuk UKumaitsasimannimut Akilegutimmik.
- Nallilonet ilinniavet Newfoundland Labradorimillu ilijausimangituk solli kenaujattâviugunnatuk AngiKatigegutingani. Adjiulitisimalungimat atâgut Newfoundland ammalu Labrador ilaliutiliaKimmat Canada-mut, ammalu federalliup kavamanga ilitatsisimangimat kamatsiagamik NunalituKaujunnik pravinsigijattini taitsumani, ilinniagalinnut paiviuKattasimajunut isumagijaulautsimangituit ilinniaviuKattasimanninginnut kavamanganut Canada.
- Taimalingagaluattillugu, ilumiutaKajuit Merz-imi AkilegutiKagiamut AngiKatigegutiusimajumi kinakkutuinnait upvalu katutjiKatigennigalait KinugautiKagunnatillugit kavamanganit Canada ilijautitsigiamut asiagut ilinniaviugiallaKattasimajuit.
- Nunatsiavut kavamanga tiguisimajut ikKatuijiligijinnik White, Ottenheimer & Baker atuinnaagutjiKullugit Kinugautiugunnatumik ilagiatsigiamut ilinniaviuKattasimajunik Labradorimi ammalu atausigiallamik ilinniaviusimajumik Taggâni Newfoundland nalunagunnaitillugit ilitagijaulillutik ilinniaviusimanningit Akilegutiugunnatuit AngiKatigegutingagut.

- Sivullipângat Kinugautiumajuk tunijausimalittuk kavamanganut Canada. Canada pivitsaKattitauniattuk 60-ni ulluni AkKigiatsiniup Ullunganit Akilegutaugunnatuit AngiKatigegutinganit kiugutiKagiamut Kinugautimmik. AkKigiatsiniup Ullusanga nigugijaujuk September 21, 2007. Canada Kipiluniappat tunijausimajumik, idluatsaiviliagutiugajattuk Kimmigutaugunnatuk Canada-mut. Canada Kipilugutimminik uKatsiagialik Kinugautiujummut.
- AkilejuKalângilak NunalituKaujunnut ilauKatauKattasimajunut dormitory/paitsiviuKattasimajunut ilinniavinnut tâtsumani pravinsimi kisiani tâkkua ilinniavet “ilitagijauppata” ammalu ilijausimallutik ilinniaviuKattasimanninginnik malillugu tâna Akilegutiugunnatuk AngiKatigegutikkut. Taimaimmat Nunatsiavut kavamangata Kinugautinga ikKanammagikKuk unuttunut inunnut.
- Ajunnatugalaugaluattilugu uKatsiagiamik Kanga nigunnamangât pijagepvisak, Nunatsiavut kavamanga KaujimatitsiKattaniattuk inunnik KanuilingajuKalimmangât.
- kinakkutuinnait aisimaKattajut dormitory upvalu ilinniavinnut paitsiviuKattasimajunut ilinniavinnut pimmagigiaKangituit mânnaujuk.
- Nunatsiavut kavamanga tukisiatsiajut unuttuit inuit tamatsuminga KanuttogutiKanninginnik taimaimmat KaujimatitsiKattaniattut takKini Kaijuni.
- White, Ottenheimer & Baker mânnaujuk Kaujisattut ullunginnik ilinniaviuKattasimajut ammasimammangâta ammalu matunnigisimajanginnik. kinatuinnak Kaujimagajattut ullunginnik ilinniaviusimajuit kamagijaullutik Kaujititsigialet Brian Lyall Nunatsiavut kavamangata suliaKapvinganik Happy Valley-Goose Bay-mi fonnilitik (709) 896-8317.

Kaujisapviugunnatuk: Karen Prentice, Aulatsijuijuk KaujimaKatigegutinginnik, Nunatsiavut kavamangata, Fonninga: 709-922-2942, Kagitaujakkut allaviugutikkulonet uvanga kprentice@nunatsiavut.com